


# WORCESTER

Worcester is aan die rand van die Karoo en geniet die streek se droër klimaat gepaard met die Wes-Kaap se natuurskoon en boerderybedryfsmoëte. Jy kan op die berge ski, en daaronder wingerd plant. Worcester is in der waarheid die grootste wynproduksie distrik in die land. Daar is 24 koöperasies en 3 private kelders op die Worcester-wynroete, asook twee brandewynkelders. Van die plantegroei is halfwoestyn, maar 'n mens kan jou ook verwonder aan die orkas en fynbos in die natuur. Die bergstrome wemel van die trout, en die riviere is geskik vir kanoë. En dan is daar die warmwaterbronne van Gautrin.

Worcester is inderdaad 'n wonderlike plek. Die dorp heet na Lord Charles Somerset se broer, die markies van Worcester, en is in 1820 gestig. Dis 'n kommersiële en onderwysentrum, wat veral bekend is vir sy skole vir die dooves en blindes.



# Worcester Gimnasium

## Skoolgeskiedenis

Voor die begin van die 18de eeu het boere al lisensies ontvang om beeste in die Breëriviervallei aan te hou. Teen 1709 was daar plase tussen die Breërivier en die Romansrivier. Die eerste erwe vir dorpsstigting in die munisipale distrik van Worcester is in Februarie 1820 op 'n openbare veiling verkoop. Ná die eerste tien jaar was daar verskeie privaat skole op die dorp en omliggende gebied.

Die Nondenominational Boys' Public School, wat die Boys' High School voorafgegaan het, het in Julie 1873 met 78 seuns begin. Die Girls' High School is in Januarie 1876 met 16 meisies begin. Dié twee skole sou later twee van die meer bekende skole in Kaapland word, en dan in 1972 saamsmelt om Worcester Hoërskool te vorm op die terrein van die seunsskool. Die ou saal en die noord-oostelike vleuel is uitgehou vir gebruik deur die nuwe skool. Die geboue van die meisieskool huisves tans die Hugo Naudé-Kunsskool. Nog 'n produk van die samesmelting was die Hoërskool Montana ten noorde van die dorp. 'n Tak van



STIGTINGSDATUM: 1992  
LEUSE: DILIGENTIA (YWER)  
ADRES: TULBACHSTRAAT,  
WORCESTER  
[WWW.WORCGIM.CO.ZA](http://WWW.WORCGIM.CO.ZA)



die Kaapse Tegnieke Kollege is in 1941 in Worcester gestig. Die skoolgebou en 'n koshuis is in 1942 geopen. In Januarie 1965 is die naam van die kollege verander in Hoër Handelskool want die opleiding van vakleerlinge is oorgedra aan die Hoër Tegnieke Skool Drostyd. Teen April 1968 is die skool oorgeneem deur die destydse Kaapse Departement van Onderwys en in 1988 is die naam verander na Hoërskool Worcester-Oos. Worcester Gimnasium is in 1992 gestig met die samesmelting van Hoërskool Worcester en Hoërskool Worcester-Oos. Albei skole het dus 'n lang geskiedenis. Dr H van der Westhuizen is die huidige hoof.



*"Daar is heelwat verskille tussen skoolrugby en professionele rugby. Toe ek vir Worcester Gim 1ste-span gespeel het was die fokus meer om pret te hê saam met jou tjommys, maar hoe hoër jy opbeweeg het in die gradering, des te meer die druk. My beste vriende kom van skool af, waar ons klein dingetjies soos selfdissipline geleer het. Die oorlogskreet, en my breiers Arthur Janson en Marius van der Bank is goeie herinneringe."*

**— JP Nel**



## Rugby by Worcester

Worcester Gimnasium het nege spanne en is konsekwent een van die Boland se sterker vyftientalle. In 2005 het hy sy afdeling in die Media 24-kompetisie gewen, 'n kompetisie waarin baie van die swaargewigte deelneem. Sedert 1964 het die skool 136 Cravenweekspelers opgelewer.

Op nasionale vlak was daar agt SA Skole-spelers, asook vyf SA o.19 en drie SA o.21 spelers. Voor die 1992 almagamasie was daar vier Springbokke: Percy Allport (1910), Buks Marais (1949), Bertus van der Merwe (1955) en Johan Oosthuizen (1974). Shandré Frolick het onlangs uitgeblink in die SA Sewes-span.

'n Gimnasium-oudleerling het ook by die Wêreldbeker van 2007 gepronk, maar nie in die Groen en Goud nie. Dit was DTH van der Merwe, wat vir Kanada gespeel het. Hoewel die krieketspelers Claude Henderson en Con de Lange en die atleet Dicky Broberg almal vir die skool se 1ste span gespeel het, is die Blou Bulle se senter JP Nel die skool se gunsteling oudleerling. Dewey Swartbooi, Aswell Peterson en Whalied Heyns is tans by Boland gekontrakteer.

Die groot derby van die jaar is teen HTS Drostyd, 'n wedwyer wat so ver as 1920 terug strek. En hoewel Gimnasium soms sukkel teen hierdie groter opponent, bly dit altyd 'n strawwe kragmeting.

## Internasionaal

**Suid-Afrika:**  
Percy Allport, Buks Marais,  
Bertus van der Merwe  
Johan Oosthuizen

**Kanada:**  
DTH van der Merwe

